



**ZIMBABWE SCHOOL EXAMINATIONS COUNCIL**  
General Certificate of Education Advanced Level

**NDEBELE LANGUAGE**  
PAPER 1

**6055/1**

**NOVEMBER 2022 SESSION**

**3 hours**

Additional materials:  
Answer paper

**ISIKHATHI:** Amahola amathathu

**IZIXWAYISO KWABAHLOLWAYO**

Bhala ibizo lakho, inombolo yendawo ohlolelwa kuyo lenombolo yakho wena ohlolwayo ezikhaleni oziphiweyo ephepheni lakho lezimpendulo/ebhukwaneni lezimpendulo.

Phendula **yonke** imibuzo.

Imibuzo yonke kumele iphendulwe **ngesiNdebele** esiqondileyo njalo esicacileyo.

Bhalela izimpendulo zakho emaphepheni okubhalela owaphiweyo.

Uma usebenzise amaphepha amabili kumbe adlulayo, **abophele ndawonye**.

**IZELULEKO KWABAHLOLWAYO**

Imiklomelo ephiwa umbuzo munye ngamunye kumbe ingxenye yombuzo itshengisiwe ezibayeni [ ] ekucineni kombuzo.

---

**Umhloliso lo ubhalelwe emakhasini amahlanu, amathathu awabhalwanga lutho.**

Copyright: Zimbabwe School Examinations Council, N2022.

## ISIGABA I

1 Khetha isihloko sibe sinye phakathi kwalezi ezilandelayo ube usubhala ngaso indaba, umbiko, ingxoxo kumbe incwadi engaba ngamabala aphakathi kwangamakhulu amahlanu lamatshumi amahlanu kusiya kwangamakhulu ayisikhombisa lamatshumi amahlanu (550 – 750). Nxa ubhale incwadi, ikheli, usuku, isibingelelo lesivaleliso akubalwa kunani lamazwi endaba. Engxoxweni, amabizo abalingiswa lawo awabalwa enanini lamabala endaba.

- (a) Ungumkhokheli wabafundi esikolo sakho, umnyaka ususemaphethelweni. Loba umbiko ozangena kubhuku lesikolo (School Magazine) uncoma njalo usola ukuziphatha kwabafundi kulumnyaka.
- (b) Loba indaba emumethe amazwi athi, “Zehla inyembezi okwezulu lisina mhlalokho ngafisa ukuthi nga abazali bami bakhona emhlabeni.”
- (c) Isisekelo esitsha sezemfundo (Updated Curriculum) siletse buhle bani kwezemfundo eZimbabwe?
- (d) Qathanisa imvunulo yamaNdebele yezolo leyalamuhla.
- (e) Loba ingxoxo yabomama bexoxa ngobubi botshwala.
- (f) Umvundla ziyawunqanda phambili.
- (g) Bhalela umzawakho ofunda kwesinye isikolo umxoxela ngenhlelo elilazo esikolo senu ezenza lizuze imali yokuthuthukisa isikolo.

[50]

## ISIGABA II

2 Bala indatshana elandelayo ube usuphendula imibuzo engaphansi kwayo.

Waseyivula incwadi le ayelokhu eyitshilatshila ezandleni wathola imi kanje:

31 Nkwenkwezi 1978

Mfowethu othandekayo

Angilawo amanengi mfowethu othandekayo. Kodwa, ukuze singachithi isikhathi esinengi siphikisana ngento engekho, ngikhethe le indlela yokukuvalalisa. Sengiduka lelizwe mina mfowethu, ngoba umhlaba uyangehlula.

Angilawo amazwi loba ulutho lokubonga amathuba amanengi lapho obe ungenyula ubunzimeni. Ngiyayazi yonke imali engangiyebileka ngisithi ngizayibuyisela. Kwehlule. Ukungihlenga kwakho lokhu kokucina, hayi, uzabongwa ngabaphansi loba ngophezulu mfowethu.

Inye zwi into eyinqaba ebesengisele layo, loba layo ngingaselamsebenzi layo njengoba ngake ngakutshela. UKhotsokhotso! (Unina aze angithethelele khonale kwabaphansi.)

Yiso isipho engikupha sona lesa Ngonyama. Mthathe umntwana. Uzakusiza. Nxa umzwangedwa wakho usilwa impi lawe, khumbula ukuthi esikweni lakithi elesintu bekuvele kusenziwa lokhu ngendlela ezehlukileyo. Nxa ufuna wena ngokwakho ukummelela aze akhule umntwana azothanyelela uMaMsie kukuwe. Nxa njalo lokho kunganambitheki, menze isisebenzi somkakho. Angithi amakhosikazi ayayathi kungcono okufika kukuncane kanje, azibumbele wona leyondlela afuna kukhule kuncedisa ngayo njengoba lugotshwa lusemanzi nje. Nango-ke, sengowakho uKhotsokhotso.

Engani ungehliselwa eziphindiweyo izibusiso ngenhliziyo yakho le elesisa. Sobonana kwelizayo.

Yimi  
uBubbles Khoza.

Wanikina ikhanda wahleka, wahleka engahleki uNgonyama. "Yimihlolo yami le kumbe kuyini?" ezibuza ngenhliziyo. Esephumisela athi, 'Woza sihambe fanami.'

Wadobha umgodlana lowo wempahlana, ngesinye isandla wabamba uKhotso. Laye umntwana wayikopela nko iminwe kaNgonyama, engani uthi, 'Ngingatshiywa ngulo ubaba, yimi yimi.' Baphuma. Wakhiya kuhle. Ubuso bakhe uNgonyama basebembeswe yinkungu yokukhathazeka. Loba sonke lesi isiga sasesisobala kuye, wayengasikhohlisi. 'Kambe sibili?' ecabanga ngenhliziyo. 'Sibili kulomuntu ongadela umntanakhe enguye yedwana, amlahlele ilizwe kanje? Kanti Bubbles wabunjwa njani uze wehluleke kangaka, wedlulwe layindwangu ekwazi ukugcina usapho lwayo luze luthi xaxa, lwanelise ukuziselela? Lokuwumana okukule incwadi yimicabango yomuntu ophefumulayo sibili, ogijima elibomvu gebhu emithanjeni yakhe?'

Kunengi ahamba ezibuza khona uNgonyama besuka eNkanyiso, baze bayakuthi gqi eBarbourfields, endlini kaBubbles. Bahle bathi besithi gaga, uNgonyama wahle wakhangwa yikunyakazela kokuyinjethshana ayengakufanisi lokukufanisa lapha ekhaya. Wahle wathi uKhotso asale emoteni, loba umntwana wayesefuna ukweqa aphume ayecinga uyise endlini. Lakanye uNgonyama afice lempahla elapha ekhaya kayiseyiyo ayazi ingeyakoKhoza. Sekubingelelwene, abuze, 'Bengidinga ukubona uKhoza obehlala kuyole indlu bakithi.'

Iphendule indoda yalapha ekhaya eyayilelizwi elincane engani ngelwesifazana, ithi, 'Wo-o, uKhoza! Uthuthile lapha, baba. Indlu le siyithengiselene sibili kwakuhle.

'Pho, uthe usethuthela kuliphi ilokitshi, mnumzana?'

'Mh-. Lokho ngingeze ngakwazi mnakwethu. Saphongulungiselana, ngulowo waqhubela omunye okungokwakhe. Sehlukana.'

'Kalitshiyelanga na ikheli lakhe?'

'Hatshi, baba.'

Ephongutshona ebuza laye uNgonyama. Uyabe etshiyelani ikheli ngoba lencwadi ezazike zifike lapha ekhaya inkosikazi seyadlula, zaziyelezi ezithonisa izikwelede kuphela.

'Lina lingene nini lapha, mnumzana?'

'Izolo, baba. Izolo sibili. Ulele lapha laye uKhoza lendodakazi, bavuka betshaya amazolo lamhla.'

'Yebo? Impahla-ke? Uzithwale ngani?'

Wahleka kancane lumuntu ethi, 'Ngingazi njalo, kodwa ezinengi wazithengisa uKhoza. Lami ngathenga okunye. Mina ngasuka ngacabanga okuthi usesiya kwenye indawo ekude, ngoba wayethengisa lempahla zomntwana, sathi mhlawumbe ufuna ukuziphungula. Ukusuka kwakhe lapha, ubethwele ibhokisi elilodwa nje zwi.'

'Hm-m! Hatshi, ngiyabonga, mnumzana,' etsho evalelisa uNgonyama esetheneke ingqondo. Walibona mhlophe iqhinga lomngane wakhe. Ukuthengisa yonke inyakanyaka, atshuquluze yonke leyomadlana, azomjikela umthwalo! Waphumisela ethi, 'Ugangile uBubbles. Impahla zomkakhe wazithengisa zonke du lomnyaka ungakapheli simbekile umuyi, lakho esenziwa yizikwelede ezingapheliyo, lokuthanda ukubheja emabhizeni lokutshova amakhasi. Khathesi uthengisa zonke impahla zomntwana amenze isihluku esinje ngokuzikhathalela yena zwi? Ngiyazi ukuthi uthe, "UNgonyama uzamthengela ezinye impahla." Udinga ukuhlanekelwa ngamadlozi kwelabantu. Angilamathe!'

Yaqhubeka imudla imicabango ethi, 'Angazi-ke ukuthi yinto uMaMsie azayizwisisa kanjani le. Omunye umlomo wokuqeda ukudla emzini wakhe!' Wabobotheka engabobotheki ecabanga lokho. Ingani kwakusehlula ezabo izihlobo zegazi. Wayengafuni kuzibona uMaMsie. Ngesikhathi impi ivutha bhe, abantu bechithekwelwa yimizi emaphandleni ikakhulu, babeyifulathela ithunqa eminye, bayekhonza ezihlotsheni zabo emadolobheni. Angithi bebefikile kwakhe ePelandaba. Babefikile abazawakhe bakaMaMsie, lonina omdala, kodwa abaze baqeda iviki, ngoba ebatshelela ukuthi bayamotsha. Kwazafika njalo uyise omdala kaNgonyama lesalukazi sakhe. Enguye yedwa uyise ayemthembile, lokhu ozala yena, lonina, batshiselwa endlini kwangcwatshwa umlotha, ngenxa yomhawu wabanye omakhelwane ababezonda ukuthi baze baphileleni ngcono bona behlupheka. Ngakho kwathiwa bangabathengisi, baphila ngemali yokuba ngabathengisi. Benziwa lesosihluku-ke, bengathonisiswanga lakuthonisiswa.

Ngakho waycfisa bahlale uNgonyama, ngoba csckhangelc kubo nxa cthi 'umzali'. Njalo nje wayelubona udubo lolu olubhahe indawana yonke. Kodwa, kwabehlula abantu abadala ukuhlala beququbele bengaxoxiswa nxa uNgonyama esemsebenzini. Lokudla babekuginya nzima besesaba ilihlo likamalokazana. Ngakho labo baphanga bedlula bethi kulesizungu kule indawo, kungcono baye eMagwegwe komunye umzukulu. Wadana uNgonyama, wazama ukubancenga ukuthi bahlale, ngoba kulowo mzukulu kugcwele nswi, yena evele ezihluphekela.

*Indaba le ivela kugwalo Impilo Yinkinga, olulotshwe nguB. Makhalisa.*

### Imibuzo

- (a) Izehlakalo ezikulindaba zenzakala ngawuphi umnyaka? [1]
- (b) Wayangaphi umkaBubbles? [1]
- (c) Yisiphi isipho uBubbles asipha uNgonyama? [1]
- (d) UBubbles uthi uNgonyama enzeni ngoKhotso? [2]
- (e) UBubbles utshiyela uNgonyama umntwana ngegunya laliphi isiko lamaNdebele? [2]
- (f) Cupha umutsho osendabeni oveza ukuthi uNgonyama wayehlala emnceda uBubbles. [2]
- (g) Yibuphi ububi obadalwa yimpi endabeni? [3]

- (h)** Usipha lobufakazi, nika imizwa emibili efikela uNgonyama ngemva kokubala incwadi evela kuBubbles. [2]
- (i)** UBubbles wephula njani amalungelo abantwana kulindatshana? [3]
- (j)** UMaMsie ngumama olesimilo esibi. Kuvela njani endabeni? [3]
- (k)** Chasisa inkulumo ezilandelayo njengokusetshenziswa kwazo endatshaneni. Ingcazelo yakho ingedluli amabala amahlanu.
- (i)** sengiduka [1]
- (ii)** ungenyula ebunzimeni [1]
- (iii)** kunganambitheki [1]
- (iv)** luthi xaxa [1]
- (v)** betshaya amazolo [1]
- (vi)** esetheneke ingqondo [1]
- (vii)** simbekile umuyi [1]
- (viii)** ukuhlanekelwa ngamadlozi [1]
- (ix)** bayekhonza [1]
- (x)** beququbele [1]
- [30]